

SIMBAHAN, MIPADANGAT SA HINABANG SA SITIO ZAPATERA

Niadtong Abril 12 gideklarar ni Mayor Edgardo Labella ang Sitio Zapatera sa Barangay Luz sa Siyudad sa Sugbo ubos sa lock down human kini nakarekord sa 3 nga positibo nga kaso sa COVID19, nga sa ngadtongadto misaka sa 135 ka mga kaso.

Samtang nahimutang ubos sa lock down, obligado ang mga residente nga magpabilin sa balay hinungdan nga magsalig lamang sila sa mga rasyon nga gikan sa gobyerno sa lungsod ug mga opisyal sa barangay.

Sa sinugdan, nabalaka ang mga residente kung unsaon nila paglahutay tungod kay naghunahuna sila nga wala'y mga paagi nga makuha nila ang mga suplay alang sa ilang adlaw-adlaw nga panginahanglan. Daghan, kung dili man tanan, sa mga residente ang nabalaka ug masabot lang kini sa ingon, tungod kay nakasinati na sila og sayo sa mga kalisud sa usa ka kahimtang sa lock down: nagkulang sa pagkaon ug tubig, mga tambal alang sa mga tigulang, ug mga suplemento ug uban pang mga kinahanglanon.

Dali nga gipahimutang ang mga operasyon sa pagtabang pinaagi sa mga paningkamot sa gobyerno sa lungsod, mga organisasyon sa sibiko, ug uban pang mga nagdonar nga nagpasalig sa suporta sa mga residente.

Sa pakigsulti kang Brgy. Kapitan Ronelio Sab-a ug Konsehal Tito Durano, si Fr. Alex Cola, Jr. (director sa Caritas Cebu Inc.) gipahibalo nga ang pagkaon maoy usa ka dakong gikabalak-an sa mga residente sa Sitio Zapatera.

Ang Archdiocese of Cebu mitampo usab sa mga relief operations uban ang mapaubsanong amot pinaagi sa Caritas Cebu Inc. sa kooperasyon sa Caritas Relief and Rehabilitation Unit, Commission on the Laity, ug SACRED FORCES. Kini nga mga organisasyon gisangonan ni Arsobispo Jose S. Palma nga buhaton ang pagplano ug operasyon diha sa paningkamot sa simbahan nga moambit sa pagpagaan sa epekto sa COVID19 sa Sugbo. Ang grupo aktibo nga miapil sa Archbishop Teofilo Camomot Buhat sa Kaluoy Program nga gi-mugna sa pagsugod sa COVID19.

Abril 24, ang unang hugpong sa mga relief goods gihatag sa Sitio Zapatera, gi-endorso kini ngadto kang Kapitan Sab-a ug sa ang iyang mga opisyaales aron ipanghatag sa mga residente. Giklaro hinuon ni Fr. Cola nga bisan ang Sitio Zapatera usa lang ka bahin sa Barangay Luz, ang gihatag nga relief goods kinahanglan nga maapod-apod lamang sa mga residente sa Sitio Zapatera sanglit mao kana ang katuyoan sa mga nagdonar.

Adunay 1,040 ka putos sa mga relief goods nga gi-endorso diin ang matag putos adunay sulod nga 5 ka kilo nga bugas, 2 ka lata sa sardinas, 2 ka lata sa beef loaf, 5 ka itlog, 2 ka pakete sa gatas, ug 1 binotelya nga tubig 6.6 litro.

Gawas pa, sa adlaw gayod sa relief operation ang mga pamilya nga nagpuyo sa Sitio Zapatera gihatagan usab og mga pagkaon nga luto na, 852 ka mineral water (6.6L), 97 ka mineral water (5gallons), 12 ka kahon sa Biscocho ug sliced bread, ug 104 ka kahon sa vitamin C .

Ang grupo sa Arsobispo Teofilo Camomot Buhat sa Kaluoy nagplano sa paghatud sa ikaduhang hugna sa mga relief goods sa Mayo 1.

Ang tibuok team nagmapasalamaton ngadto sa mga nagmahinatagon ug mipaambit sa ilang mga gasa niining panahon sa wala'y kasiguruhan. Ang hiniusa nga paningkamot sa simbahan, kauban ang uban pang mga sektor, nagpamatuod lamang nga ang Kristohanon nga pagtuo mapakita bisan sa panahon sa kasakit ug pag-antus, ug naglig-on sa bugkos sa panagigsoonay diha sa komunidad nga nasentro sa Dios.